

Hol Muhammed wul Mowluud

Porfeseer Muhammed Wul Mawluud kanndidaa e woote gardagol leydi marse 2007, ko kam woni horeejo Dental Doole Bamtaare (UFP), parti dimmo to bannge keewal depiteeji. O jibinaa ko e hitaande 1953 to Tiisiksa, diiwaan Tagante. Omo jogii sukaaɓe tato. O jangginta ko dudal jaabi haadtirde (Iniwersitee) Nuwaasoot.

Ko 1965 o naati janɗe hakkundeere. Kono o riiwaa e hitaande 1972 sabu gerew. O jeyanoo gila oon sahaa ko e ardiibe dillere elewaaji e sandaaji suudiinde. E hitaande 1981 o winndii to Iniwersitee Ndakaaru, o hebi, e hitaande 1985 seedantaagal biyeteengal DEA, o wafti jangginde to Iniwersitee Nuwaasoot. E hitaande 2000 o hebi doktoraa makko e fannu daartol to Iniwersitee Pari I Panthéon Sorbonne.

Laawol o rewi to bannge politik waawaa seerndeede e laawol luundo e nder leydi Muritani :

- Ummaade 1970 haa 1972, ko kanko ardinoo Goomu ngenndiyankeewu ngardiingu hare elewaaji janɗe hakkundeere (CPASS). Ko o tergal Goomu politik Sayhat el Madluum (Wulaango kiidaado) mballiftoonoongu jaaynde wiyeteende kadi Sayhaat el Madluum.

- E hitaande 1971 o woni tergal ardorde suudiinde Dillere Demokaraasi Ngenndiyankoore (MND) wonande diiwaan Nuwaasoot, hade makko naatde, e hitaande 1972, ardorde ngenndiire dillere nde. Eɗen ciftina tan ko hare ndeen dillere addani laamu ndeen waɗde won diin mbayliigaaji to bannge faggudu e politik e kitaale 1970 (juurnitagol jotondire hakkunde leydi ndi e Farayse, baɗtugol Mifermaa e njiimaandi leydi ndi ...).

- Ummaade 1974 haa 1975 o ardiima luulindinoobe pusgol MND e naattugol mum e nder PPM, hono parti Muttaar Wul Daddah laaminooɗo leydi ndi e oon sahaa. Dum addi ceertugol, e hitaande 1976, e wonannoobe naatgol e PPM, anndiraaɓe "Chartiste" en. Nde wolde Saharaa ummii, o meedaani seerde, kanko e terɗe dillere makko, daranaade dartingol ndee wolde fenaande hakkunde biɓɓe yummiraaɓe. Oon jam danyoyaa ko e hitaande 1979. Ko e hitaande 1976 Muhammed Wul Mawluud arditii mahtagol Dillere MND nde o ardii haa nde fusaa e lewru ut 1998.

- E kitaale 1980 o daraniima no feewi habaade miijooji peccooji (safalbe e baleebe fof). Omo jeyaa e fuddube pottitte ngam nyifde fitina hakkunde Muritani e Senegaal, tuggude 1988 haa marse 1993 (yeru : semineer Ndakaaru lewru marse 1989).

- Sabu darnde makko seedtinnde ngam habaade batte kewkewe 1989, laamu Muritani sukki mo diir, woppaani ha o uuji o mooloyii caggal leydi fotde duubi didi. O arti do ko caggal yaafuya (Amnistii) laamu, ngam tawtoreede daawal compugol demokaraasi, caggal nde Doosde leydi kese ngootaa e lewru Sulyee 1991.

- O arditii golle MND ngam cosgol Dental Doole Demokaraasi (UFD) kam e woote gardagol leydi 1992. Caggal nde luural joli e nder UFD (1997–1998), MND felliti fusde njuɓɓudi mum cuudiindi, wonti UFD (b), yuɓɓini batu mum mooɓondiral kenyaangu, toɗɗii mo yo o won hooreejo parti o. E hitaande 1998, UFD (b) wonti UFP (Dental Doole Bamtaare). Nii woni UFP ummini politik mum kaaldigal, ɗaɓɓiri ɗum denndaangal pelle politik luulndo salinoongo oon politik. ɗum addani laamu Wul Taaya jaɓde naatnude won ɗiin mbayliigaaji e nder doosde woote (code electoral); kadi, e hitaande 2001, laamu ngu etii yuɓɓinde woote laabtude : ko ndeen luulndo ngo ganyii meeriji e depiteeji.

- Muhammed Wul Mawluud fof e jokkude noddude laamu ngu e kaaldigal, meedaani seerde e daranaade hujjaaji luulndo ngo e suurtude e nyinde bonanndeeji e tiid-koyaagu laamu ngu, haa arti noon e dumbugol hoohooɓe politik. Tuggude 1992 haa jooni o meedaani jaɓde wonde kandidaa, sibu o woppanta ko yahdiibe politik walla ndeen kanndidaa bajjo wonande luulndo ngoo fof.

Muhammed wul Mawluud jeyaa ko e sosbe Goomu Ndaraniingu Kisal e Deeyre e nder Afrik hirnaange (Club de veille pour la Paix en Afrique de l'Ouest).